

# Santiago

---

## Santiago ishim Porrosht aabo òr saludo.

**1** <sup>1</sup>Yok Santiago. Yok Porrosht ir yilak hn eyok Irhìch Jesucristo ir yilakpo. Tokosim saludo erze israel oso òr wee dose uje okarèhe lekityoni hn odebuhu erze dihipo kināho òr hnimo.

## Òr eyuwo de uje tāra Porrosht.

<sup>2</sup>Pishìbo watsaklo, olak Porrosht aabo. Uje nos wir kuche tìr olak par uje prowa olak ich tyenij olak aylpa pork <sup>3</sup>erahalo uje shì tìr olak par prowa kimijì otiislo Cristo o kimijì ye otiislope. Uje ewenta ich shuu olak ma ye otiislope. <sup>4</sup>Shish tyenij olak ewenta erze uje tìr olak nehech uhurc ich ma olak pwele ewenta. Heke ich ùrpa uje ye otiislo Porroshtpe hn ye olak koswāhape. <sup>5</sup>Olak yeèk uje sehe ñiraha kuchit shì tyenij sapur Porrosht hn Porrosht takashim ire par uje shuu chiraha, hn Porrosht ye diyuhu lahwospe par uje shuu pook pork erze uje otsapur ire wichi shish shuu ochiraha. <sup>6</sup>Shì tyenij sapur hn ye dotiis hn ishimìhi ire. Ye duhu ire koswāha, pork uje yeèk sapur hn koswāha wichi shì itso onoota bahluta wokor. Uje myent tibichu ich shuu tìr pit yet. Wisik wisik ich shuu tìr pit yet. <sup>7</sup>Ese uje koswāha ye ompe chibite uje eyok Irhìch takashim ire uje sapur. <sup>8</sup>Hnakirbich uje koswāha ich yelij eyuwo chihì lalerc.

<sup>9</sup>Porrosht aap uje ich losuhlaap ich tyenij aylpa pork ir owich de Porrosht ahìr. <sup>10</sup>Porrosht aap uje ich irhìch dich, kimijì pyert ir kushjāro ich shish tyenij aylpa pork ir owich de Porrosht ahìr. Erze ir kushjāro tyenij sìhna ire shìchish shì itso erze floro uje de aach. <sup>11</sup>Deeych tokole ich duhlpā. Chihit asa pohorrza hn shuu erze floro nos kako hn kayihì hnìnich. Erze floro ich ihìrts pisho per shì sìhna ire. Ese irhìch dich shì itso. Uje yesh chishew obiyo hn ir kushjāro sìhna ire shìchish.

## Porrosht aabo tyenij òr ewenta erze uje tìr òr.

<sup>12</sup>Titim olak. Ich om par ese hnakirbich uje ewenta erze uje tìr ire. Uje ewenta nehech uhurc ich premit ompa de par ire. Ese ir premit wichi uu ir ikirìt uje de Porrosht ahìr. Porrosht chibite lahwoskite par uje tyenij

ishim erze uje otsahmūr ire ese ikirīt uje yelij nihna ire. <sup>13</sup>Uje yeēk sehe duhu olak yet niyokōr uje mīhnik ich ye ompe uje wichi tata im: — Porrosht sehe duhu tiyokōr uje mīhnik.— Ye ōr pwelpe oshuu Porrosht shiyokōr uje mīhnūwo, hn ire yelij duhu oso oniyokōr uje mīhnik. <sup>14</sup>Kal nohmira shi ire uje sehn̄yēr ire par uje shiyokōr uje mīhnik. Wap shi shuu deyuwo tisirīhi erze kuch mīhnūwo hn uje ich uhurc hn sahmūr erze mīhnūwo <sup>15</sup>hn shiyokōr. Uje ich yakaha shiyokōr erze mīhnūwo shuu itsorz hn erze mīhnūwo shuu toy. <sup>16</sup>Pishibo watsaklo, ye ehnyērlo olak. <sup>17</sup>Nos wir kuche uje ich ihirtso, ye mīhnūwo chih̄i ehette wir tāra poōrc. Tāra Porrosht uje de poōrc. Wichi uje shiyokōr deeych hn shiyokōr shekurko hn shiyokōr porrzeebe. Wir uje nos chih̄it nāhu īrmo hn shish sihn̄ak laleryo, heke shish shuu ir puuruwo sihn̄ak laleryo per Porrosht yelij duhu ire kinaha. <sup>18</sup>Shi pork wichi sahmūr eyok pork ye yotiis ir ahwospe uje ich ūru hn shuu eyok shurhāpo par uje yomsaha par eyok ir aabo. Wichi nos shiyokōr erze uje de īrmo per eyok uje yomsaha wap par Porrosht aabo shi eyok itso jōro webich oso uje ochekushu.

#### Porrosht sahmūr uje oshiyokōr uje om.

<sup>19</sup>Pishibo watsaklo, shi tyenij nos ērlo uje oso otata hn ye ey olak uhut shichish, hn ye aas olak uulo shichish, <sup>20</sup>pork yeēk uje chesdelo ye niyokōrpe erze om uje Porrosht sahmūr. <sup>21</sup>Heke tyenij nos moymlō erze olak iluu mīhnū hn moymlōpo erze kuche mīhnūwo uje oso oshiyokōrīhiye. Ye olak narim olak. Ahakōrlo uje Porrosht ahwoso tata uje erahalo. Ir ahwoso wir shi itso jōro eyhi uje Porrosht chukwerīhi olak aho. Ir ahwoso pwele shuu etīrlo Porrosht ahir nehe. <sup>22</sup>Tyenij ahakōrlo uje ir ahwoso tata hn ye shi ērlo pork kimiji shi ērlo hn ye ahakōrlo hn shi olak pyens uje ich om itsorz ich shi ehnyērlo olak uhulo itsorz. <sup>23</sup>Uje yeēk chunt Porrosht ahwoso hn ye niyokōrpe wichi shi itso ese hnakīrbich uje teychim dechibich pejta ehete. Umo ir dechibich <sup>24</sup>per uje tokole ich chikey ire shichish. <sup>25</sup>Porrosht ahwoso wate ley uje shuu Porrosht aabo oshiyokōr uje Porrosht sahmūr, hn Porrosht aabo otsahmūr oshiyokōr oshuu itsorz hn yelij onoym. Uje yeēk tēr Porrosht ahwoso hn ye dikeype pork sehe diraha par uje shiyokōr uje tata, Porrosht takashim ire. <sup>26</sup>Uje yeēk chibite uje ire Porrosht aap hn ye tibey lahwope wichi shi sehn̄yēr ire hn uje teeychāha Porrosht ich ye jukur. <sup>27</sup>Porrosht uu eyok Deych sahmūr erze uje oteeychāha ire hn oshiyokōr uje ire sahmūr. Sehe duhu otakashim erze kuhn̄ere hn poluu uje ōr nesita kuche, per ye oniyokōr erze mīhnūwo uje oso oshiyokōrīhi ahnūwo īrmo.

#### Ye ompe oniyokōr kinaha par yet hn kinaha par yet.

**2** <sup>1</sup>Pishibo watsaklo, eyok ye yotiislo eyok Irh̄ich Jesucristo. Wichi ich dichpa. Olak Porrosht aabo toy, heke ye ompe uje ahakōrlo

uhulo kinaha par yet hn kinaha par yet. Tyenij nos uhulo òr ilye. <sup>2</sup>Shi titeēta tuu itsorz. Kimiji akashilo olak owich hn hnakirbich taācha uje ich irhīch dich. Ir hmarte oro hn ir ishuwo ich ihīrts pisho, hn hnakirbich losuhlaap taācha toy uje ir ishuwo ilaraabo. <sup>3</sup>Kimiji eychimlo ese irhīch dich uje ir ishuwo ihīrtso hn atimlo par uje sakaha ese owich uje ich ihīrtpa, hn atimlo ese losuhlaap on: —Shi alehe wahacha,— o kimiji atimlo on: —Akahachis hnimich pibita ahir.— <sup>4</sup>Uje ahakōrlo uhulo itsorz ich ahakōrlo kinaha par yet hn kinaha par yet. Ich uhulo olak itso jwe uje òr iluu mihnū pork ye ahakōrlo uhulo òr ilyepe. <sup>5</sup>Pishibo watsaklo, ērlo ahnūwo pahwoso uje titim olak. Porrosht chihla erze uje oso ochii òr losuhlaaboho par uje ye lotiis irpe pork chibite lahwoso par ishim wir òr owich erze uje otsahmūr ire. <sup>6</sup>Per olak uhulo opook erze uje òr losuhlaabo pork ye uhulo òr ilo erze ihīr deyo. Ye oniyokōr uje mīhnikīhi olak per erze ihīr deyo wir uje oloter olak hn oshuu ohnoy olak otseya olak jwe ikich. <sup>7</sup>Wir uje shi oloter Cristo ir iich toy. Cristo wichi uu olak yinsirc. <sup>8</sup>Kimiji yelij aluwelo asa ley waa je ich ihīrpa uje de Porrosht ahwoso eheth ich ahakōrlo uje ich ompa. Asa ley tata shuu itsorz: —Tyenij ahmūr eshibo uhu itso owa uje ahmūr owa.— <sup>9</sup>Per kimiji ahakōrlo uhulo kinaha par yet hn kinaha par yet ich ahakōrlo uje ich mīhnik pork aluwelo uje Porrosht ley tata. <sup>10</sup>Kimiji yeēk chihī uje nos shiyokōr uje Porrosht ley tata per shi iyuwe Porrosht ley sohmira ich nos iyuwe Porrosht ir ley, <sup>11</sup>pork Porrosht chibite lahwoso im: —Ye orāha,— hn tata toy im: —Ye tuk yet uhu toy.— Kimiji ye orāhape per tuk yet uhu toy ich aluwe Porrosht ley. <sup>12</sup>Erahalo uje Porrosht wichi jwe uje teychim eyok nehe kimiji yiyuwe erze ley uje Cristo chibite uje ich ihīr pishi o kimiji ye yiyuwepe heke ye ompe uje yiyuwe. Ye aluwelo uje athilo kuche hn ye aluwelo uje ahakōrlo kuche. <sup>13</sup>Uje yeēk chihī hn ye nuunape uje yet losuhlaap par takashim ich Porrosht wichi jwe. Tyenij teychim ese uje ye takashim leshibichpe kimiji niyokōr uje mīhnik o ye niyokōrpe hn ye Porrosht nuunape uje wichi losuhlaap par uje takashim. Erze uje ochuuna uje òr leshibo losuhlaabo hn otakashim òr wir uje Porrosht chuuna uje òr losuhlaabo hn takashim òr uje otīr ire ahir nehe par uje teychim òr kimiji oniyokōr mīhnūwo o ye oniyokōrpe.

### Òr ahwoso de uje ye jukur.

<sup>14</sup>Pishibo watsaklo, ese uje tata uje ye lotiis Jesuspe per ye niyokōrpe uje Jesús sahmūr ich ye ir ahwoso jukur. ¿Je wichi Porrosht aap uje shi tata uje ye lotiis Jesuspe? <sup>15</sup>Shi titeēta kuchit. Kimiji Porrosht aap hnakirap o kimiji timchar ir ishuwo nīhyok o kimiji ir poso nīhyok par ese deeych, <sup>16</sup>kimiji olak yeēk tatim ire shuu itsorz im: —Sehe tuu bu eyhi hn eheth kiis. Sehe ye tuu hmemit nēhi owape hn ew uje shi owa ahmūr.— Ye jukur uje wichi shuu itsorz uje ye dosim uje ire nesita.

<sup>17</sup>Heke ese uje tata uje ye lotiis Jesuspe ich tyenij shiyokōr uje om par uje shuu imeheeych uje ire Porrosht aap. Kimiji ye niyokōrpe uje om ich ye jukur erze ir ahwoso. <sup>18</sup>Kimiji yeēk tatim olak yet im: —Atim yokike uje owa Porrosht aap pork ye otiis Jesuspe per yok tiyokōr uje Porrosht sahmūr.— Owa yok uje ye otiis Jesuspe per ye ahakōr uje Porrosht sahmūr hn yok itspo, tokowa owa uje ye tokotiis Jesuspe pork tiyokōr uje Porrosht sahmūr. <sup>19</sup>Ye otiispe uje shi Porrosht nohmira uje de. Ich om uje ata uhu itsorz. Demonyo itspo, wir ye olotiispe oshuu itsorz heke otolpa nehech ōr ikiyo tāra.

<sup>20</sup>Athaka uje ye otiis Jesuspe per ye ahakōr uje wichi sahmūr, heke owa shi itso uje owa totihla. Shi ata uje ye otiis Jesuspe hn ye ahakōr uje sahmūr, heke tyenij tuu imeheeych uje ahwoso ye jukur. <sup>21</sup>Tyenij owa eyucha uu eyok porokkite Abraham lishi. Uu ir ijit iich otsii Isaac. Shiyokōr altar hn chibite Isaac eeychkite par uje shuu hn ishim Porrosht shuu itso uje Porrosht tatim ire heke Porrosht chibite uje Abraham ir iluu om hn ir owich de Porrosht ahir. <sup>22</sup>Imeheeych uje Abraham ye lotiis Porroshtpe pork shiyokōr uje ire tata. Uje shiyokōr shuu itsorz ich shuu imeheeych uje ich ūrpa uje ye lotiis Porroshtpe. <sup>23</sup>Heke Porrosht ahwoso ich yakaha uje tata uje Abraham ye lotiis Porrosht petikkite heke Porrosht ishi ir hñitew hn shuu owich de dahir. Oso otata uje Abraham wichi Porrosht ihyērak <sup>24</sup>heke ich imeheeych uje Jesús ishi oso ōr hñitewihñi Porrosht ahir shi uje oshiyokōr uje ire sahmūr pork ye olotiis irpe. Ye doshipe par erze uje shi otata uje ye olotiis irpe. <sup>25</sup>Shi itspo asa timcharrza waa je iich otsii Rahab. Wate yitoro. Porrosht perdonar watkite pork takashim erze hnakirbo uje wir israel oso ōr pahne, hn shuu oyuhwo ochikāha dehet yet. <sup>26</sup>Shi titeēta. Kimiji oso ōr ichibiyo tokole ich otoy. Shi itspo erze oso uje otata uje ye olotiis Jesuspe hn ye oniyokōr uje Porrosht sahmūr, ich ōr ahwoso ye jukur.

### Oso ōr ahārc shi itso jwekita.

**3** <sup>1</sup>Pishibo watsaklo, ye uhu olak kihniya uje amsahalo par ahakorāhalo ōr Porrosht ahwoso. Uje Porrosht teychim daabo nehe kimiji oniyokōr uje om o kimiji ye oniyokōrpe ich erahalo uje ōryok uje oiyokorāha oso ich ma chukwi ōryok iluu je erze yewo. <sup>2</sup>Nos yināhalo kuche ich kihniya. Kimiji yeēk chihñi Porrosht aabo ōr ehēt uje yelij nimehñi uje tata ich ir iluu om pishi. Chiraha uje tibey ire par uje ye niyokōrpe uje mñhñik. <sup>3</sup>Shi titeēta uje yimchahalo kabyuhwo freno ahwo par yonāhalo ich yuhulo shiyokōr uje eyok yahmūrlo. Eyok pwele yomtis ire. <sup>4</sup>Hn titeēta kuchit yet. Pohir wir ich deyo. Uje myent data tibichu ich chukus, per ir yinsiro ochishew asa timon waa je ijaap hn ochobirho erze pohir oshuu tñr uje ōr ire otsahmūr. <sup>5</sup>Eyok ahārc ich itspo. Wichi ijaap per pwele tata kuche ich shuu dichpa par shuu eyok narim eyok. Erahalo

uje jwekita waa je ijaap ich pwele sēru hmonte uje ich dich hn shuu nos duhlu. <sup>6</sup>Oso ōr ahārc ich itso asa jwekita. Kuche mihnūwo ich kihniya tāra oso ōr ahārc. Wichī uje shuu ōr iluu mihnū hn shuu oshiyokōr uje ich mihnūwo. Ōr ahārc shi itso jwekita uje tāra Satanás.

<sup>7</sup>Hnakirbo nos oshuu doshīpo kināho kināho masaabo. Chipirme itspo hn echire hn erze uje de onoot bahluta ehēt nos oshuu masaabo. <sup>8</sup>Per shi ōr ahārc nohmira uje ye ōr pwelpe par uje otsontew. Wichī shi itso echeēt uje ich wos deyo uje ye ōr pwele oduhu masaappe pork ōr ahārc shish tata uje ich mihnūwo. <sup>9</sup>Shi pork eyok ahārc de ich yiitilo uje Porrosht uu eyok Deych ich dich. Hn itspo eyok ahārc yii eyok uhut hn yiyuhulo eyok ahwoso mihnūwo par eyok leshibo uje Porrosht shiyokōr ōrni shuu ōr itso ire. <sup>10</sup>Pishībo watsaklo, yiyuhu eyok ahwoso uje ich om hn yiyuhu eyok ahwoso uje ich mihnūwo hn nos tāra eyok ahwo. Ye ompe uje yiyokōrlo yuhulo itsorz. <sup>11</sup>Shi titeēta jotsit uje sohmira. Ye ōr pwelpe ochiyuhu awit uje ihīrt hn uje chiyok. Eyok ahwo itspo, ye ompe uje ahwoso om hn ahwoso mihnūwo tāra eyok ahwo. <sup>12</sup>Pishībo watsaklo, shi titeēta kuchit yet. ¿Je ōr pwele ochekushu naraje hn ir ee mango? ¿Je ompo uje ochekushu limon hn ir ee porosuwo? Ye ir ee tokolpe itsorz. Itso jotsit nohmet. Ye ōr pwelpe ochiyuhu awit uje chiyok hn uje ich ihīrt.

#### Ode uje Porrosht shuu ōr eykdeyo.

<sup>13</sup>Titim olak. Ese uje ma eykdeyo olak ehēt tyenij shuu imeheeych uje eykdeyo pork ir iluu om hn shiyokōr uje om. Tyenij ye narim ire par uje shuu ochiraha uje ire eykdeyo. <sup>14</sup>Per kimiji abitlo pishi olak leshibo ōr kushjāro hn kimiji sehe uhu olak no ma uje olak ma deyo hn atimlo yewo uje itsorz ich ahakōrlo mīhnik. Porrosht ahwoso tata uje wir mihnūwo. Erze uje onarim ire otsata uje ich ūru. <sup>15</sup>Erze ōr eyuwo uje itsorz ye tāra poōrzpe. Shi tāra erze oso uje ode nāhu ĩrmo. Tāra erze uje ōr iluu mihnū. Tāra dyablo. <sup>16</sup>Uje oso opota pishi yet kuche hn sehe oduhu ire ma deyo shish tokole uje yelij onahmūrye hn nos oshiyokōr kuche kihniya uje ich mihnūwo. <sup>17</sup>Erze oso uje Porrosht shuu ōr eykdeyo wir ich ōr iluu ihīr pishi hn ōr aho kiis. Ōr ile om hn oshiyokōr erze uje ōr bahuwo otatim ōr. Erze uje Porrosht shuu ōr eykdeyo shish ochuuna uje oso ōr losuhlaabo hn otakashim ōr. Shish oshiyokōr uje ich om hn yelij oniyokōr kinaha par yet hn kinaha par yet hn yelij ōr aho yūhursh. <sup>18</sup>Oso uje oshuu oso yewo ōr aho kiis ich oshuu ōr iluu om. Wir shi ōr itso uje ochukwēr jōro ehi hn ich uhurc ich ochekushu uje ich om.

#### Erze ĩrmo ishujāro kināho hn erze uje Porrosht sahmūr ich kināho.

**4** <sup>1</sup>Titim olak kimiji erahalo ¿inaapo heke shish atsilye hn ahakosloye? Ahakōrlo itsorz pork olak aho pota kuche hn erahalo uje ich ye ompe heke olak aho chiilehet. <sup>2</sup>Sehe uhulo kuche chihni olak ahir per ye

odosim olakpe. Heke ich tukulo yet hn abitlo yet ir kuche per ye olak pwelpe eshlo ese uje ich ahmürlo. Heke ich ahakosloye hn atsilye per ye eshipe pork ye apurlo Porroshtpe par uje ishım olak uje ahmürlo. <sup>3</sup>Uje apurlo Porrosht ich ye dosim olakpe pork shi sehe apurlo par olak no ma shi par uje ahakörlo uje ahmürlo.

<sup>4</sup>Olak athilo uje ahmürlo Porrosht per ma ahmürlo ĩrmo ishujáro itso timcharrza uje torāha dabich. ¿Je ye erahalope erze uje ma otsahmür ĩrmo ishujáro ochii Porrosht namāha? Uje yeek chıhi hn chıbite uje erze ĩrmo ishujáro ich ĩhırtso par ire ich chii Porrosht namāha. <sup>5</sup>¿Je olak eyuwo tisır uje ye jukur uje Porrosht ahwoso tata shuu itsorz: —Porrosht Ichıbich uje de eyok aho ich ajırmık pork sarhak eyok?— <sup>6</sup>Porrosht takashım eyok pork ir ahwoso tata shuu itsorz: —Porrosht sontew erze uje onarım ire per takashım erze uje yelij onarım ire.— <sup>7</sup>Asımlo olak Porrosht par uje ahakörlo uje ire sahmür. Hn atımlo dyablo uje ye ahakörlope uje ire sahmür, hn wıchı tokolıhi olak ahır. <sup>8</sup>Uhu olak eyuwo dishew par uje eeychāhalo Porrosht hn ire itspo shuu deyuwo chısh olak. Moymlo erze kuche mıhnüwo uje ahakörlo shi itso uje erhülo olak hme, hn olak tyenij enshiilo olak aho pork ye ompe uje olak aho yūhursh. <sup>9</sup>Uje ahakörlo kuche mıhnüwo ich shısh olak aylpa. Ye ompe uje itsorz. Tyenij eenılo uje ahakörlo mıhnüwo heke olak dosdarak hn eyerhlopa. <sup>10</sup>Ye olak narım olakıhi eyok İrhıch ile ikıch heke wıchı takashım olak.

#### **Ye ompe athilo uje olak leshıbıch shıyokör mıhnik uje ye erahalope.**

<sup>11</sup>Pıshıbo watsaklo, ye eyehnimlo olak leshıbıch. Uje eyehnimlo ire ich shi eyehnimlo Porrosht ir ley. Hn uje uhulo olak itso jwe hn ebitılo shi itso uje ich ye ompe Porrosht ir ley. Uje ebitılo olak uhulo itsorz ich ye ahakörlope uje asa ley tata. Shi uhulo olak ma deyo je Porrosht ir ley. <sup>12</sup>Shi Porrosht wıchı uje de uje chıbite asa ley. Wıchı uje yesh jwe. Pwele shuu oso ör owıch de dahır hn pwele shuu otır urhuta bahluta ehı. ¿Per owa yeekpo uje ebıte owa par jwe par uje ata uje owa eshıbıch shıyokör uje mıhnik?

#### **Ye odıraha latıkpo tokole dechole.**

<sup>13</sup>Ĕrlo uje titım olak, olak uje uhulo itsorz on: —Ele ahle o kimiji dechole hn oyıtır ese dit o kimiji ese dit yet. Oyiyakahachıs nehech äyt nohmıra par uje oyıyokör öryok ibıyo hn oyerz hnote.— <sup>14</sup>Per ye erahalope latıkpo tokole dechole. ¿Eyok ikırıt latıkpo? Shi itso isihılıt uje ihnimıch, per wısık wısık ich nıhyok. <sup>15</sup>Ma om uje athılo on: —Kimiji eyok İrhıch nahmür, dechole ich ehı öryok İka hn oyıyokör wıchı o kimiji oyıyokör yet.— <sup>16</sup>Per yelij athılo uhulo itsorz. Shi olak narım olak uje ekıtkerloye par uje ahakörlo kuche. Uje olak narım olak uhulo itsorz ich ahakörlo uje mıhnüwo. <sup>17</sup>Ese uje chıraha uje ich om par uje shıyokör hn ye niyokörpe ich shıyokör uje ich mıhnik uje Porrosht ye nahmürpe.

**Uje ih̄ir deyo oshiyokōr mih̄nūwo ich tyenij cheeshi t̄ir ōrpo.**

**5** <sup>1</sup>Ērlo pahwoso uje titim olak uje olak ih̄ir deyo uje ahakōrlo mih̄nūwo. Tyenij eyerhlo hn ebichlo pork erze kuche mih̄nūwo uje t̄ir olak nehe ich dospa. <sup>2</sup>Uu olak ishujāro ich nos taata, hn uu olak ishuwo ich nos ih̄nēro tew. <sup>3</sup>Olak oro hn olak plata ich ye jukur. Wir shi itso uje fyerit taata hn ir ukult tokole. Erze ir ukulo shuu imeheeych uje ye akashimlo yewo heke ahakōrlo m̄ih̄nik, hn erze ir ukulo tyenij shuu otsepyēr olak shi itso uje jwekita tew olak. Shi etiyērlo olak kuche uje ich ih̄irtso ich kih̄niya ele h̄nimich nehech ele ahle. <sup>4</sup>Ērlo pahwoso. Ehnyērlo erze uje ochish obiyoho olak shakirra eh̄et ochekushu jōro, hn ye eshlo ōrpe. Wir otibich hn eyok ĩrh̄ich uje ukurbo deyo de chunt ōr. <sup>5</sup>Uje olak de nāhu ĩrmo ich olak ih̄ir deyo hn olak kushjāro kih̄niya ich ih̄irtso hn shish eylo kuche uje ahmūrlo. Shi olak itso wōjo uje och̄ira par uje oshuu sohlo. Erze wōjo sahmūr erze labiso uje tew nehech terihi ese deeych uje oshuu. <sup>6</sup>Olak denunsa erze uje ye oniyokōrpe uje m̄ih̄nikni hn tukulo ōr uhulo otoy. Ye onontew olakpe.

**Porrosht aabo tyenij ōr ewenta erze kuch mih̄nūwo uje t̄ir ōr.**

<sup>7</sup>Pish̄ibo watsaklo, tyenij olak ewenta erze uje prowa olak uje ehn yahpaa eyok ĩrh̄ich taācha nehe. Shi olak itso ese uje chukwēr jōro ĩr shakirra eh̄et hn iyem par uu jōro ee. Shi iyem ishir̄it uje ĩbik par chukwēr jōro. Iyem toy ishir̄it par chekushu jōro. <sup>8</sup>Olak ĩtspo shish tyenij olak ewenta erze uje prowa olak hn ye uhu olak koswāha pork eyok ĩrh̄ich tyenij taācha shichish. <sup>9</sup>Pish̄ibo watsaklo, ye eshlo majamichihiye pork kim̄iji eyehnimlo olak lesh̄ibo ich Porrosht wichi jwe uje tyenij sepyēr olak. Wichi de par sepyēr olak shichish shi itso uje dechi pwert ebich par masaha eh̄et. <sup>10</sup>Pish̄ibo watsaklo, uhulo olak ilo uu profeta poruwo wish̄i uje otatim ōr eyok ĩrh̄ich ĩr ahwoso. Uje kuche prowa ōr ich shish ōr ewenta. <sup>11</sup>Erahalo uje nos otata uje ich ōr aylpa erze uje ōr ire ewenta erze kuche uje prowa ōr. Ich nos entloni uje Job ewenta erze kuche uje prowa ire, hn erahalo uje ich uhurzkite hn eyok ĩrh̄ich takashim ire. Heke imeheeych uje eyok ĩrh̄ich shish chuuna uje kuche mih̄nūwo t̄ir eyok hn takashim eyok. <sup>12</sup>Pish̄ibo watsaklo, titim olak erze uje ma tyenij ahakōrlo. Uje sehe ath̄ilo ēhe ich shi on: —Ēhe.— Hn uje sehe ath̄ilo uje n̄ihyok ich shi ath̄ilo n̄ihyok, hn ye ata ahwoso ma par uje uhu imeheeych uje olak ahwoso ich ūru. Ye ebiilo kuche uje de poōrc hn ye ebiilo kuche uje de h̄nimich par uje shuu imeheeych uje olak ahwoso ich ūru. Ye ebiilo kuche kināho. Kim̄iji ebiilo yewo uhulo ĩtsorz ich Porrosht tyenij sepyēr olak.

<sup>13</sup>Kim̄iji olak yeēk uje kuche m̄ih̄ntik t̄ir ire ich tyenij ire orar. Hn kim̄iji olak yeēk eh̄et kiis ich tyenij teechi seēt imno uje shuu Porrosht

ich dich. <sup>14</sup>Kimijĩ olak yeẽk permo ich shuu otibii erze anciano uje otibey Porrosht aabo par uje wir õr orar otsapur Porrosht par ire. Shi otsapur eyok Irhĩch ir iich hn otormĩhi wichi aseYTE. <sup>15</sup>Uje erze anciano ye olotiis Porroshtpe hn otsapur par ese uje permo ich eyok Irhĩch chukuta ire. Kimijĩ shiyokõr kuche mihñũwo ich Porrosht perdonar ire. <sup>16</sup>Heke uje olak yeẽk shiyokõr mihñikĩhi deshĩbich ich tyenij tĩr ire par uje sapur perdon, hn shish olak orarye. Uje ahakõrlo uhulo itsorz hn Porrosht chukuta olak. Porrosht aap uje ir iluut om uje orar ich ir ukurbo deyo de pork Porrosht tẽr ire hn shiyokõr uje sapur. <sup>17</sup>Uu profeta Elías lishi hnakirap shi itso eyok. Uje orar ich sinaha ire par uje ye ibikpe hn ye ibikpe nehech tre äyo hn pehet iya. <sup>18</sup>Uje orarponi par uje ibik hn ibik. Heke erze pohir nos pohna. Uje terihi ishirĩt hn ir ee de.

<sup>19</sup>Pishĩbo watsaklo, uje olak yeẽk saham uje ich ũru hn yet shuu cheeshpo par uje shiyokõr uje Porrosht ahwoso tata, <sup>20</sup>ich erahalo uje yeẽk shuu iim erze mihñũwo uje shish shiyokõr ich takashim wichi par uje ye tope hn shuu Porrosht perdonar erze kuche mihñũwo uje wichi shiyokõr ich kihniya.